

SKOA: No ta nenga mucha enseñansa pero mayor mester cumpli

ORANJESTAD – Aña escolar nobo casi ta cuminsa y te ainda ta existi mayornan cu no a yega di inscribi nan yiuunan, asina tambe tin otro cu ya a cuminsa prepara e materialnan y uniform pa bay scol.

Bon Dia Aruba a haya un entrevista cu Anuesca Baly, Director General di Stichting Katholiek Onderwijs Aruba (SKOA), kende a splica con ta bayendo cu e inscripcion di muchanan pa aña escolar 2019-2020 y e retonan cu nan a asumi desde haci algun tempo y tambe aworaki.

Baly a bisa cu aña escolar nobo ta presenta hopi reto, compara cu aña pasa. El a expresa cu SKOA ta contento cu e resultadonan di e muchanan cu a pasa nan examen, pero ainda ta existi un espacio pa mehoracion.

Di mesun manera, Baly a expresa cu aña pasa nan a introduci inscripcion online pa medio di website di SKOA: Esaki tambe ta trece su reto cune pa via di SKOA su tamaño. SKOA ta un organizacion basta grandi cu 46 scol na Aruba riba nivel primario, secundario, kleuter y basico, por lo tanto haci inscripcion online ta un reto pasobra no tur mayor ta adapta cu medio digital ainda, pero e pensamiento pa 2021 ta cu tur scol y tur asunto escolar lo bay digital. Si mayornan no ta bon cu tecnologia, tambe tin e opcion di bay na oficina di SKOA pa inscribi nan yiu.



Tabata existi un rumor unda ta bisa cu SKOA ta scoge cua alumno tin mag di cuminsa scol y ki tempo. Baly a aclaria cu, pa ley, te ainda un alumno cu ta dreña scol primario mester tin cuater aña, sinembargo, e mayor por inscribi su yiu den un lista di espera si e mucha lo bay cumpli cuater aña prome cu december y ora cu SKOA ta caba di procesa tur e alumnonan di cuater aña y ainda tin luga e mucha por haya un espacio.

Igualmente, el a destaca cu na e momentonan aki tur nan scol ubica pabou di brug ta yen. Pero ora ta papia di MAVO, Filomena College y San Agustín ainda tin par di luga bashi. Pa locual ta scol basico, tambe ta full, pero el a sigura cu mayornan mester tin na cuenta cu e mayornan mester inscribi nan yiuunan. Tocante e reinscripcion, cual ta bay online, e mayornan mester aplica pa e yiu por inscribi di nobo.

Ademas e director a duna

di conoce cu un alumno cu ta inscribi na un scol cu ta cay bou nan, tin cu paga Afl 175,00 pa aña. Esaki ta encera actividadnan y seguro, ademá si e scol tin aircro, e mayornan mester paga Afl 150,00 adicional. Loke ta yega na Afl 325,00 total pa aña. Di parti di gobierno nan ta haya cierto fondo cu ta cubri algun gasto, pero esaki no ta cubri tur cos.

Pa e motibo ey, Baly a bisa cu nan a cuminsa cu inscripcion desde luna di februari y nan tin un areglo di pago cu

ta permiti mayornan cu no por paga di bialha pa paga den varios parti.

E Director kier subraya cu mayornan mester realisa cu, si e mayornan no ta paga e cifra rekeri, e mucha no por asisti actividadnan pafo di scol, pero tampoco SKOA ta nenga cu e mucha por haya otro actividad na e mesun momento ey den scol. Importante ta cu e mucha por haci su actividad.

Mas o menos 70 estudiante sin permiso inscribi pa 2019-2020

ORANJESTAD - Tocante e muchanan cu no tin status regular di estadia formalisa, Director di SKOA, Anuesca Baly a comenta cu pa e aña escolar nobo nan tin aproximadamente 70 inscripcion. Pa e parti aki el a sigura cu SKOA no ta nenga pa ningun mucha e derecho di enseñansa, locual nan ta pone como exigencia ta cu tin cierto rekisitonan cu nan mester cumpli.

Un di nan ta pa cuminsa haya lesnan di idioma Hulandes mientras e temporada di scol ta cuminsa y nan mester tin

un seguro priva por si acaso algun accidente paden of pafo di scol mester tuma luga. 30 di nan a registra caba for di luna di januari, pero nan no tin ni un base di Hulandes y e otro cantidad restante a haya lesnan pa por defende nan mes.

Baly a informa cu pa e muchanan aki, gobierno a implementa e proyecto Prisma cu ta especificamente pa muchanan for di 6 te cu 12 aña di edad cu no ta papia Hulandes, esunnan cu tin otro nacionalidad y nan por asisti na Scol Prisma

Renobacion y reconstruccion di 3 scol plania pa 2020

ORANJESTAD – Durante entrevista cu Anuesca Baly, Director di SKOA, a menciona cu den combersacion cu e mandatario encarga cu infraestructura a palabrá cu na 2020 lo bay renoba 1 scol y reconstrui 1 scol.

Segun Baly, Minister di Desarojo Teritorial, Infraestructura y Medio Ambiente Otmar Oduber a palabrá cu SKOA cu lo bay reconstrui Colegio Frere Bonifacius, mientras lo renoba St. Aloysiuschool. Ambos renobacion lo tuma luga den 2020. Banda di esaki Colegio San Hose lo haya su renobacion, cual lo ta special mirando cu e lo ta moderno

y tin palabracion pa mantene característica arkitectonico di Misa Inmaculada Concepcion na Santa Cruz.

Un gran parti di scolnan cu ta resorta bou di SKOA ta parti di un enclave di Obispado cu arkitektura cu ta similar na misanan Catolico. SKOA ta e entidad apunta pa Obispa-

do pa salvaguardia esaki y pa motibo ey SKOA y Obispado ta comparti e pensamiento cu mester salvaguardia herencia historico di e identidad y característica arkitectonico di e edificionan, di scolnan Catolico pa nan por keda similar na e misanan Catolico ora di renobacion of reconstruccion.

